



王摩詰集卷第四

五言律詩

奉和聖製賜史供奉曲江宴應制

侍從有鄒枚瓊筵就水開言陪栢梁宴新下  
建章來對酒山河滿移舟草樹迴天文同麗  
日駐景惜行杯

從岐王過楊氏別業應教

揚子談經所淮王載酒過興闌啼鳥換坐久  
落花多逕轉迴銀燭林開散玉珂嚴城時未



啓前路擁笙歌

從岐王夜讌衛家山池應教

座客香貂滿官娃綺幔張  
澗花輕粉色山月少燈光  
積翠紗窓暗飛泉繡戶涼  
還將歌舞出歸路莫愁長

和尹諫議史館山池

雲館接天居霓裳侍玉除  
春池百草外芳樹萬年餘  
洞有仙人錄山藏太史書  
君恩深帝且莫上空虛

同崔員外秋宵寓直

建禮高夜秋承明候曉過九門  
寒漏徹萬井曙鍾多月迥  
藏珠斗雲消出絳河更慙衰朽  
質南陌共鳴珂

奉和楊駙馬六郎秋夜即事

高樓月似霜秋夜鬱金堂  
對坐彈盧女同看舞鳳凰  
少兒多送酒小玉更焚香  
結束平陽騎明朝入建章

酬虞部蘇員外過藍田別業不見啓

之作

貧居依谷口喬木帶荒村石路枉迴駕山家  
誰候門漁舟膠凍浦獵火燒寒原唯有白雲  
外踈鐘聞夜猿

酬北部楊負外暮宿琴臺朝躋書閣  
率爾見贈之作

舊簡拂塵看鳴琴候月彈桃源迷漢姓松樹  
有秦官空谷歸人少青山昔日寒羨君棲隱  
處遙望白雲端

酬嚴少尹徐舍人見過不遇

公門暇日少窮巷故人稀偶值乘藍輦非關  
避白衣不知炊黍否誰解掃荆扉君但傾茶  
椀無妨騎馬歸

慕容承携素饌見過

紗帽烏皮几閑居懶賦詩門看五柳識年筭  
六身知靈壽君王賜彫胡弟子炊空勞酒食  
饌持底解人願

酬慕容上

行行西陌返，駐爐問車公。挾轂雙官騎，應門  
五尺僮。老年如塞北，強起離牆東。為報壺丘  
子，來人道姓蒙。

酬張少府

晚年唯好靜，萬事不關心。自顧無長策，空知  
返舊林。松風吹解帶，山月彈照琴。君問窮通  
理，漁歌入浦深。

喜祖三至留宿

門前洛陽客，下馬拂征衣。不枉故人駕，平生  
多掩扉。行人返深巷，積雪帶餘暉。早歲同袍  
者，高車何處歸。

荅

祖詠

四年不相見，相見復何為。握手言未畢，卻令  
傷別離。升堂還駐馬，酌醴便呼兒。語默自相  
對，安用傍人知。

酬賀四贈葛巾之作

野巾傳惠好，茲貺重兼金。嘉此幽栖物，能齊  
隱吏心。早朝方暫掛，晚沐復來簪。坐覺囂塵

遠思君共入林

寄荊州張丞相

所思竟何在  
悵望深荆門  
舉世無相識  
終身思舊恩  
方將與農圃  
藝植老丘園  
目盡南飛鳥  
何由寄一言

輞川閑居贈裴秀才迪

寒山轉蒼翠  
秋水日潺湲  
倚仗柴門外  
臨風聽暮蟬  
渡頭餘落日  
墟里上孤煙  
復值接輿醉  
狂歌五柳前

冬晚對雪憶胡居士水

寒更傳曉箭  
清鏡覽衰顏  
隔牖風驚竹  
開門雪滿山  
灑空深巷靜  
積素廣庭閑  
借問袁安舍  
脩然尚閉關

山居秋暝

空山新雨後  
天氣晚來秋  
明月松間照  
清泉石上流  
竹喧歸浣女  
蓮動下漁舟  
隨意春芳歇  
王孫自可留

終南別業

中歲頗好道晚家南山郵興來每獨往勝事  
空自知行到水窮處坐看雲起時偶然值林  
叟談笑無還期

歸嵩山作

清川帶長薄車馬去閑閑流水如有意暮禽  
相與還荒城臨古渡落日滿秋山迢遞嵩高  
下歸來且閉關

歸輞川作

谷口踈鍾動漁樵稍欲稀悠然遠山暮獨向  
白雲歸菱蔓弱難定楊花輕易飛東臯春草  
色惆悵掩柴扉

韋給事山居

幽尋得此地詎有一人曾大壑隨堦轉群山  
入戶登庖厨出深竹印綬隔垂藤即事辭軒  
冕誰云病未能

山居即事

寂寞掩柴扉蒼茫對落暉鶴巢松樹遍人訪  
草門稀綠竹含新粉紅蓮落故衣渡頭煙火

起處處採菱歸

終南山

太一近天都連山到海隅白雲回望合青靄  
入看無分野中峯變陰晴衆壑殊欲投人處  
宿隔水問樵夫

輞川閒居

一從歸白社不復到青門時倚簷前樹遠看  
原上村青菰臨水映白鳥向山翻寂寞於陵  
子桔槔方灌園

春園即事

宿雨乘輕屐春寒着弊袍開畦分白水間柳  
發紅桃草際成碁局林端舉桔槔還持鹿皮  
几日暮隱蓬蒿

淇上田園即事

屏居淇水上東野曠無山日隱桑柘外河明  
間井間牧童望村去獵犬隨人還靜者亦何  
事荆扉乘晝關

與盧象集朱家



主人能愛客終日有逢迎  
賞得新豐酒復聞秦女  
箏柳條踈客舍槐葉下  
秋城語笑且爲樂吾將  
達此生

過福禪師蘭若

巖壑轉微徑雲林隱法堂  
羽人飛奏樂天女跪焚香  
竹外峯偏曙藤陰水更涼  
欲知禪坐久行路長春芳

黎拾遺昕裴秀才迪見過秋夜對雨之作

促織鳴已急輕衣行向重  
寒燈坐高館秋雨聞踈鐘  
白法調狂象玄言問老龍  
何人顧蓬逕空愧牛羊蹤

晚春嚴少尹與諸公見過

松菊荒三徑圖書共五車  
烹葵邀上客看竹到貧家  
鵲乳先春草鶯啼過落花  
自憐黃髮暮一倍惜年華

過感配寺曇興上人山院

暮持筇竹杖相待虎溪頭  
催客聞山響歸鳥

逐水流野花叢發好谷鳥一聲幽夜坐空林  
窈松風直似秋

同前

裴迪

不遠灞陵邊安居向十年入門穿竹逕留客  
聽山泉鳥嘯深林裏心閑落照前浮名竟何  
益從此願栖禪

夏日過青龍寺謁操禪師

龍鍾一老翁徐步謁禪宮欲問義心義遙知  
空病空山河天眼裏世界法身中莫怪銷炎  
熱能生大地風

同前

裴迪

安禪一室內左右竹君幽有法知不染無言  
誰敢酬鳥飛爭向夕蟬噪已先秋煩暑自茲  
適清涼何所求

鄭果州相過

麗日照殘春初晴草木新牀前磨鏡客樹下  
灌園人五馬驚窮巷雙童逐老身中厨辦麩  
飯當怨阮家貧

過香積寺

不知香積寺數里入雲峯古木無人徑深山  
何處鍾泉聲咽危石日色冷青松薄暮空潭  
曲安禪制毒龍

過崔駙馬山池

畫樓吹笛妓金椀酒家胡錦石稱貞女青松  
學大夫脫貂貫桂醕射鴈與山厨聞道高陽  
會愚公谷正愚

送李判官赴東江

聞道皇華使方隨皂蓋臣封章通左語冠冕  
化文身樹色分楊子潮聲滿富春遙知辨璧  
吏恩到泣珠人

送封太守

忽解羊頭削聊馳熊首轡揚舲發夏口按節  
向吳門帆映丹揚郭楓藏赤岸村百城多候  
吏露冕一何尊

送嚴秀才還蜀

寧親為令子似舅即賢甥別路經花縣還鄉

入錦城山臨青塞斷江向白雲平獻賦何時  
至明君憶長卿

送張判官赴河西

單車曾出塞報國敢邀勳見逐張征虜今思  
霍冠軍沙平連白雪蓬卷入黃雲慷慨倚長  
劍高歌一送君

送岐州源長史歸

握手一相送心悲安可論秋風正蕭索客散  
孟嘗門故驛通槐里長亭下堇原西征舊旌  
節從此向河源

送張道士歸山

先生何處去王屋訪茅君別婦留丹馱驅雞  
入白雲人間苦難住天上復離群當作遼城  
鶴仙歌使爾聞

同崔興宗送瑗公

言從石菌閣新下穆陵關獨向池陽去白雲  
留故山綻衣秋日裏洗鉢古松間一施傳心  
法唯將戒定還

送錢少府還藍田

草色日向好桃源人去稀手持平子賦目送  
老萊衣每候山櫻發時同海鷺歸今年寒食  
酒應是返柴扉

留別錢起

卑棲却得性每與白雲歸徇祿仍懷橘看山  
免採薇暮禽先去馬新月待開扉霄漢時迴  
首知音青瑣闈

送丘爲往唐州

宛洛有風塵君行多苦辛四愁連漢水百口  
寄隨人槐色陰清晝楊花惹暮春朝端肯相  
送天子繡衣臣

留別丘爲

歸鞍白雲外繚繞出前山今日又明日自知  
心不閒親勞簪組送欲趁鶯花還一步一迴  
首遲遲向近關

送元中丞轉運江淮

薄賦歸天府輕徭賴使臣歡霑賜帛老恩及

卷綃人去問珠官俗來經石劫春東南高亭  
上莫使有風塵

送崔九興宗遊蜀

送君從此去轉覺故人稀徒御猶迴首田園  
方掩扉出門當旅食中路授寒衣江漢風流  
地遊人何歲歸

送崔興宗

已恨親皆遠誰憐友復稀君王未西顧遊宦  
盡東歸塞迥山河淨天長雲樹微方同菊花  
節相待洛陽扉

送平淡然判官

不識陽關路新從定遠侯黃雲斷春色畫角  
起邊愁瀚海經年別交河出塞流須令外國  
使知飲月支頭

送孫秀才

帝城風日好況復建平家玉枕雙文簾金盤  
五色瓜山中無魯酒松下飯胡麻莫厭田家  
苦歸期遠復賒

送劉司直赴安西

絕域陽關道胡沙與塞塵三春時有鴈萬里  
少行人首著隨天馬蒲桃逐漢臣當令外國  
懼不敢覓和親

送趙都督赴代州

天官動將星漢上柳條青萬里鳴刁斗三軍  
出井陘忘身辭鳳闕報國取龍庭豈學書生  
輦窓間老一經

送方城韋明府

邊思葭菼際寥落楚人行高鳥長淮水平燕  
故郢城使車聽雉乳縣鼓應雞鳴若見州從  
事無嫌手板迎

送李員外賢郎

少年何處去負米上銅梁借問阿戎父知為  
童子郎魚牋請詩賦幢布作衣裳薏苡扶衰  
疾歸來幸可將

送梓州李使君

萬壑樹參天千山響杜鵑山中一夜雨樹杪

百重泉漢女輸幢布巴人訟芋田文翁翻教  
授不敢倚先賢

送張誣歸宣城

五湖千萬里况復五湖西漁浦南陵郭人家  
春穀溪欲歸江淼淼未到草萋萋憶想蘭陵  
鎮可宜猿更啼

送友人南歸

萬里春應盡三江鴈亦稀連天漢水廣孤客  
郢城歸鄖國稻苗秀楚人菰菜肥懸知倚門

望遙識老萊衣

送賀遂員外外甥

南國有歸舟荆門泝上流蒼茫葭菼外雲水  
與昭丘檣帶城烏去江連暮雨愁猿聲不可  
聽莫待楚山秋

送楊長史赴果州

袞斜不容憶之子去何之鳥道一千里猿聲  
十二時官橋祭酒客山木女郎祠別後同明  
月君應聽子規



送邢桂州

饒吹喧京口風波下洞庭  
赭圻將赤岸擊汰復揚舲  
日落江湖白潮來天地青  
明珠歸合浦應逐使臣星

送宇文三赴河西充行軍司馬

橫吹雜繁笳邊風卷塞沙  
還聞田司馬更逐李輕車  
蒲壘成秦地莎居屬漢家  
當令犬戎國朝聘學昆耶

送孫二

郊外誰相送夫君道術親  
書生鄒魯客才子洛陽人  
祖席依寒草行車起暮塵  
山川何寂寞長望淚沾巾

送崔三往密州觀省

南陌去悠悠東郊不少留  
同懷扇枕戀獨念倚門愁  
路遶天山雪家臨海樹秋  
魯連功未報且莫蹈滄洲

送丘為落第歸江東

憐君不得意况復柳條春  
為客黃金盡還家

白髮新五湖三畝宅萬里一歸人知爾不能  
薦羞為獻納臣

漢江臨汎

楚塞三湘接荆門九派通江流天地外山色  
有無中郡邑浮前浦波瀾動遠空襄陽好風  
月留醉與山翁

登辨覺寺

竹徑從初地蓮峯出化城窓中三楚盡林上  
九江平輦草乘趺坐長松響梵聲空居去雲

外觀世得無生

涼州郊外遊望

野老纔三戶邊村少四鄰婆娑依里社蕭鼓  
賽田神灑酒澆芻狗焚香拜木人女巫紛屢  
舞羅襪自生塵

觀臘

風勁角弓鳴將軍獵渭城草枯鷹眼疾雪盡  
馬蹄輕忽過新豐市還歸細柳營迴看射鵰  
處千里暮雲平

春日上方即事

好讀高僧傳時看辟穀方鳩形將刻杖龜殼  
用支牀柳色春山映花明夕鳥藏北窓桃李  
下閒坐但焚香

汎前陂

秋空自明迥况復遠人間暢以沙際鶴兼之  
雲外山澄波淡將夕清月皓方閒此夜任孤  
棹夷猶殊未還

游李山人所居因題屋壁

世上皆如夢狂來或自歌問年松樹老有地  
竹林多藥倩韓康賣門容尚子過翻嫌枕席  
上無那白雲何

登河北城樓作

并邑傳巖上客亭雲霧間高城眺落日極浦  
映蒼山岸火孤舟宿漁家夕鳥還寂寥天地  
暮心與廣川閑

登裴秀才迪小臺

端居不出戶滿目望雲山落日鳥邊下秋原

人外閑遙知遠林際不見此簷間好客多乘  
月應門莫上關

被出濟州

微官易得罪謫去濟川陰執政方持法明君  
無此心間閻河潤上并邑海雲深縱有歸來  
日各愁年鬢侵

千塔主人

逆旅逢佳節征帆未可前窓臨汴河水門渡  
楚人船雞犬散墟落桑榆蔭遠田所居人不

見枕席生雲煙

使至塞上

單車欲問邊屬國過居延征蓬出漢塞歸鴈  
入胡天大漠孤煙直長河落日圓蕭關逢候  
吏都護在燕然

崔錄事

解印歸田里賢哉此丈夫少年曾任俠晚節  
更爲儒遁世東山下因家滄海隅已聞能狎  
鳥余欲共乘桴

成文學

寶劍千金裝登君白玉堂身爲平原客家有  
邯鄲娼使氣公卿座論心遊俠場中年不得  
志謝病客遊梁

晚春閨思

新粧可憐色落日卷羅帷鑪氣清珍簾墻陰  
上玉墀春蟲飛網戶暮雀隱花枝向晚多愁  
思閑窓桃李時

戲題示蕭氏甥

憐爾解臨池渠翁未學詩老夫何足似弊宅  
倘因之蘆笋穿荷葉菱花罨鴈兒郗公不易  
勝莫著外家欺

秋夜獨坐

獨坐悲雙鬢空堂欲二更雨中山果落燈下  
草虫鳴白髮終難變黃金不可成欲知除老  
病唯有學無生

待儲光羲不至

重門朝已啓起坐聽車聲要欲聞清珮方將

出戶迎晚鍾鳴上苑踈雨過春城了自不相  
顧臨堂空復情

聽宮鶯

春樹遶宮牆宮鶯轉曙光忽驚啼蹇斷移處  
弄還長隱葉棲承露攀花出未央遊人未應  
返爲此思故鄉

早朝

柳暗百花明春深五鳳城城烏睥睨曉宮井  
轆轤聲方朔金門侍班姬玉輦迎仍聞遣方

士東海訪蓬瀛

愚公谷三首

愚谷與誰去唯將黎子同非須一處住不那  
兩心空寧問春將夏誰論西復東不知吾與  
子若箇是愚公

吾家愚谷裏此谷本來平雖則行無跡還能  
響應聲不隨雲色暗只待日光明緣底名愚  
谷都由愚所成

借問愚公谷與君聊一尋不尋翻到谷此谷

不離心行處曾無險看時豈有深寄言塵世  
客何處欲窺林

雜詩

雙燕初命子五桃新作花王昌是東舍宋玉  
次西家小小能織綺時時出浣沙親勞使君  
問南陌駐香車

過始皇墓

古墓成蒼嶺幽宮象紫臺星辰七曜隔河漢  
九泉開有海人寧渡無春鴈不廻更聞松韻

切疑是大夫哀

故太子太師徐公挽歌四首

功德冠群英彌綸有大名軒皇用風后傳說  
是星精就第優遺老來朝詔不名留侯常辟  
穀何苦不長生

謀猷為相國翊贊奉乘輿劔履升前殿貂蟬  
託後車齊侯疏土宇漢室賴圖書僻處留田  
宅仍纔十頃餘

舊里趨庭日新年置酒辰聞詩鸞渚客獻賦

鳳樓人北首辭明主東堂哭大臣猶思御朱  
輅不惜汗車茵

久踐中台座終登上將壇誰言斷車騎空憶  
盛衣冠風日咸陽慘笳簫渭水寒無人當便  
闕應罷太師官

故西河郡杜太守挽歌三首

天上去西征雲中護北平生擒白馬將連破  
黑雕城忽見芻靈苦徒聞竹使榮空留左氏  
傳誰繼卜商名

返葬金符守同歸石窆妻卷衣悲畫翟持翼  
待鳴雞容衛都人慘山川駟馬嘶猶聞隴上  
客相對哭征西

塗芻去國門祕器出東園太守留金印夫人  
罷錦軒旌旄轉衰木簫鼓上寒原墳樹應西  
靡長思魏關恩

故南陽夫人樊氏挽歌

錦衣餘翟黻繡轂罷魚軒淑女詩長在夫人  
法尚存凝笳隨曉旆行哭向秋原歸去將何



見誰能返戟門

送奚侍郎夫人寇氏二首

束帶將朝日鳴環映牖辰能令明諫主相勸  
識賢人遺掛空留壁迴文日覆塵金蠶將畫  
柳何處更知春

女史悲彤管夫人罷錦軒卜筮占二室行哭  
度千門秋日光能淡寒川波自翻一朝成萬  
古松柏暗平原

恭懿太子挽歌五首

何悟藏環早纔知拜壁年翀天王子去對日  
聖君憐樹轉宮猶出笳悲馬不前雖蒙絕馳  
道京兆別開阡

蘭殿新恩切椒宮夕臨幽白雲隨鳳管明月  
在龍樓人向青山哭天臨渭水愁雞鳴常問  
膳今恨玉京留

騎吹凌霜發旌旗夾路陳禮容金節護冊命  
玉符新傳母悲香禩君家擁畫輪射熊今夢  
帝秤象問何人

蒼舒留帝寵子晉有仙才五歲過人智三天  
使鶴催心悲四祿館目斷望思臺若道長安  
近何為更不來

西望昆池闕東瞻下杜平山朝豫章館樹轉  
鳳凰城五校連旗色千門疊鼓聲金環如有  
驗還向畫堂生

王摩詰集卷第四

王摩詰集卷第五

五言排律

奉和聖製慶玄元皇帝玉像之作應

制

明君夢帝先寶命上齊天秦后徒聞樂周王  
耻卜年玉京移大像金籙會群仙承露調天  
供臨空敞御筵斗迴迎壽酒山近起爐煙願  
奉無為化齊心學自然

奉和聖製與太子諸王三月三日龍



池春楔應制

故事修春楔新宮展豫遊明君移鳳輦太子  
出龍樓賦掩陳王作杯如洛水流金人來捧  
劔畫鷁去廻舟苑樹浮宮闕天池照冕旒宸  
章在雲表垂象滿皇州

奉和聖製上巳於望春亭觀楔飲應  
制

長樂青門外宜春小苑東樓開萬戶上輦過  
百花中畫鷁移僊妓金貂列上公清歌邀落  
日妙舞向春風渭水胡秦甸黃山入漢宮君  
王來袞楔灞漣亦朝宗

奉和聖製幸玉霄公主山莊因題石  
壁十韻之作應制

碧落風煙外瑤臺道路賒如何連帝苑別自  
有仙家比地廻鑿駕緣溪轉翠華洞中開日  
月窓裡發雲霞庭養冲天鶴溪留上漢查種  
田生白玉泥竈化丹砂谷靜泉逾響山深日  
易斜御羨和石髓香飯進胡麻大道今無外

長生詎有涯還瞻九霄上來往五雲車

奉和聖製暮春送朝集使歸郡應制

萬國仰宗周衣冠拜冕旒玉乘迎大客金節  
送諸侯祖席傾三省褰帷向九州楊花飛上  
路槐色蔭通溝來預鈞天樂歸分漢主憂宸  
章類河漢垂象滿中州

三月三日曲江侍宴應制

萬乘親齊祭千官喜豫遊奉迎從上苑  
校向中流草樹連容衛山河對冕旒畫旗搖浦  
淑春服滿汀洲仙樂龍媒下神皋鳳蹕留從  
今億萬歲天寶紹春秋

奉和聖製十五夜燃燈繼以酺宴

上路笙歌滿春城漏刻長遊人多晝日明月  
讓燈光魚鑰通翔鳳龍輿出建章九衢陳廣  
樂百福透名香仙妓來金殿都人遶玉堂定  
應偷妙舞從此學新粧奉引迎三事司儀列  
萬方願將天地壽同以獻君王

奉和聖製重陽節宰臣及群官上壽

應制

四海方無事三秋大有年百生逢此日萬壽  
願齊天芍藥和金鼎茱萸插玳筵玉堂開右  
箇天樂動宮懸御柳踈秋景城鴉拂曙煙無  
窮菊花節長奉栢梁篇

三月三日勤政樓侍宴應制

綵仗連宵合瓊樓拂曙通年光三月裏宮殿  
百花中不數秦王日誰將洛水同酒筵嫵落  
絮舞袖怯春風天保無爲德人歡不戰功仍  
臨九衢宴更達四門聰

和陳監四郎秋雨中思從弟據

嫵嫵秋風動淒淒煙雨繁聲連鵙鵲觀色暗  
鳳凰原細柳踈高閣輕槐落洞門九衢行欲  
斷萬井寂無喧忽有愁霖唱更陳多露言平  
原思令弟康樂謝賢昆逸興方三接衰顏強  
七奔相如今老病歸守茂陵園

和僕射晉公扈從溫湯

天子幸新豐旌旗渭水東寒山天仗裏溫谷

幔城中奠玉群仙座焚香太一宮出遊逢牧  
馬罷獵有非熊上宰無爲化明時太古同靈  
芝三秀紫陳粟萬箱紅王禮尊儒教天兵小  
戰功誼猷歸哲匠詞賦屬文宗司諫方無闕  
陳詩且未工長吟吉甫頌朝夕仰清風

和宋中丞夏日遊福賢觀天長寺即

陳左相宅所施之作

已相殷王國空餘尚父溪釣磯開月殿築道  
出雲梯積水浮香象深山鳴白雞虛空陳妓  
樂衣服製虹霓墨點三千界丹飛六一泥桃  
源勿遽返再訪恐君迷

沈十四拾遺新竹生讀經處同諸公  
之作

閑居日清靜修竹自檀欒嫩節留餘籜新叢  
出舊闌細枝風響亂踈影月光寒樂府裁龍  
笛漁家伐釣竿何如道門裏青翠拂仙壇

贈東岳焦練師

先生千歲餘五嶽通曾居遙識齊侯鼎新過

王母廬不能師孔墨何事問長沮王管時來  
鳳銅盤即釣魚竦身空裏語明目夜中書自  
有還丹術時論太素初頻蒙露版詔時降軟  
輪車山靜泉逾響松高枝轉踈支願問樵客  
世上復何如

贈焦道士

海上遊三島淮南預八公坐知千里外跳向  
一壺中縮地朝珠闕行天使玉童飲人聊割  
酒送客乍分風天老能行氣吾師不養空謝  
君徒雀躍無可問鴻濛

投道一師蘭若宿

一公栖太白高頂出雲煙梵流諸壑遍花雨  
一峯偏迹爲無心隱名因立教傳鳥來還語  
法客去更安禪晝涉松路盡暮投蘭若邊洞  
房隱深竹清夜聞遙泉向是雲霞裏今成枕  
席前豈唯暫留宿服事將窮年

山中示弟等

山林吾喪我冠帶爾成人莫學嵇康懶且安

原憲貧山陰多北戶泉水在東鄰緣合妄相  
有性空無所親安知廣成子不是老夫身

韋侍郎山居

幸忝君子顧遂陪塵外蹤閑花滿巖谷瀑水  
映杉松啼鳥忽臨澗歸雲時抱峰良遊盛簪  
紱繼跡多夔龍詎枉青門道胡聞長樂鐘清  
晨去朝謁車馬何從容

田家

舊穀行將盡良田可未希老年方愛粥卒歲  
且無衣雀乳青苔井雞鳴白板扉柴車駕羸  
犝草屨牧豪豨多雨紅榴折新秋綠芋肥餉  
田桑下憇旁舍草中歸住處名愚谷何煩問  
是非

過盧員外宅看飯僧共題七韻

三賢異七賢青眼慕青蓮乞飯從香積裁衣  
學水田上人飛錫杖檀越施金錢趺坐簷前  
日焚香竹下煙寒空法雲地秋色淨居天身  
逐因緣法心過次第禪不須愁日暮自有一



燈燃

濟州過趙叟家宴

雖與人境接閉門成隱居道言莊叟事儒行  
魯人餘深巷斜暉靜閑門高柳踈荷鋤修藥  
圃散帙曝農書上客搖芳翰中厨饋野蔬夫  
君第高飲景晏出林間

青龍寺墨壁上人兄院集

吾兄大開蔭中明徹物外以定力勝敵以惠  
用解嚴深居僧坊傍俯人里高原陸地下映

芙蓉之池竹林果園中秀菩提之樹八極氣  
霽萬彙塵息太虛寥廓南山爲之端倪星州  
蒼茫渭水貫於天地經行之後趺坐而閑升  
堂梵筵餌客香飯不起而遊覽不風而清涼  
得世界於蓮花記文章於貝葉時江寧大兄  
持片石命維序之詩五韻坐上成

高處敞招提虛空詎有倪坐看南陌騎下聽  
秦城鷄眇眇孤煙起芊芊遠樹齊青山萬井  
外落日五陵西眼界今無染心空安可迷

同前

王縉

林中空寂舍階下終南山高卧一牀地迴看  
六合間浮雲幾處滅飛鳥何時還問義天人  
接無心世界閑誰知大隱客兄弟自追攀

同前

王昌齡

本來清淨所竹樹引幽陰簷外含山翠人間  
出世心圓通無有象聖境不能侵真是吾兄  
法何妨友弟深天香自然會靈異識鐘音

同前

裴迪

靈境信為絕法堂出塵氛自然成高致向下  
看浮雲迤邐峯岫列參差間井分林端遠堞  
見風末踈鐘聞吾師久禪寂在世超人群

春過賀遂員外藥園

前年槿籬故新作藥欄成香草為君子名花  
是長卿水穿盤石透藤繫古松生書畏開厨  
走蒙倒屣迎蔗漿菰米飯芍醬露葵羹頗  
識灌園意於陵不自輕

河南嚴尹弟見宿弊廬訪別人賦十

韻

上客能論道吾生學養蒙貧交世情外才子  
古入中冠上方簪笏車邊已畫熊拂衣迎五  
馬垂手憑雙童花醪和松屑茶香透竹叢薄  
霜澄夜月殘雪帶春風古壁蒼苔黑寒山遠  
燒紅眼看東侯別心事北川同為學輕先輩  
何能訪老翁欲知今日後不樂為車公

送秘書晁監還日本國

積水不可極安知滄海東九州何處遠萬里  
若乘空向國唯看日歸帆但信風鰲身映天  
黑魚眼射波紅鄉樹扶桑外主人孤島中別  
離方異域音信若為通

送禰郎中

東郊春草色驅馬去悠悠况復鄉山外猿啼  
湘水流島夷傳露坂江館候鳴騶卉服為諸  
吏珠官拜本州孤鶯吟遠墅野杏發山郵早  
晚方歸奏南中纔忌秋

送康太守

城下滄江水江邊黃鶴樓朱欄將粉堞江水  
映悠悠鏘吹發夏口使君居上頭郭門隱楓  
岸候吏趨蘆州何異臨川郡還勞康樂侯

送熊九赴任安陽

魏國應劉後寂寥文雅空漳河如舊日之子  
繼清風阡陌銅臺下閭閻金虎中送車盈灞  
上輕騎出關東相去千餘里西園明月同

送李太守赴上洛

商山包楚鄧積翠藹沉沉驛路飛泉灑關門  
落照深野花開古戍行客響空林板屋春多  
雨山城晝欲陰丹泉通號略白羽抵荆岑若  
見西山爽應知黃綺心

送權二

高人不可 清論復何深一見如舊識一言  
知道心明時當薄宦解薛去中林芳草空隱  
處白雲餘故岑韓侯久攜手河嶽共幽尋悵  
別千餘里臨堂鳴素琴

遊化感寺

翡翠香煙合琉璃寶地平龍宮連棟宇虎穴  
傍簷楹谷靜惟松響山深無鳥聲瓊峯當戶  
折金澗透林鳴郢路雲端迥秦川雨外晴鳳  
王銜果獻鹿女踏花行抖擻辭貧里歸依宿  
化城繞籬生野蕨空館發山櫻香飯青菰米  
嘉蔬綠芋羨誓陪清楚末端坐學無生

遊悟真寺

聞道黃金地仍開白玉田擲山移巨石呪嶺  
出飛泉猛虎同三逕愁猿學四禪買香燃綠

桂乞火踏紅蓮草色搖霞上松聲汎月邊山  
河窮百二世界滿三千梵宇聊憑視王城逐  
渺然灞陵纔出樹渭水欲連天遠縣分諸郭  
孤村起白煙望雲思聖主披霧憶群賢薄宦  
慙尸素終身擬尚玄誰知草庵客曾和栢梁  
篇

與蘇盧二員外期游方丈寺而蘇不  
至因有是作

共仰頭陀行能忘世諦情迴看雙鳳闕相去

一牛鳴法向空林  
說心隨寶地平  
手巾花氎淨香  
帔稻畦成  
聞道邀同舍  
相期宿化城  
安知不來往  
翻得似無生

曉行巴峽

際曉投巴峽  
餘春憶帝京  
晴江一女浣  
朝日衆雞鳴  
水國舟中市  
山橋樹杪行  
登高萬井出  
眺迥二流明  
人作殊方語  
鶯爲舊國聲  
賴諧山水趣  
稍解別離情

早入滎陽界

汎舟入滎澤  
茲邑乃雄藩  
河曲閭闔隘  
川中煙火繁  
因人見風俗  
入境聞方言  
秋田晚疇盛  
朝光市井喧  
漁商波上客  
鷄犬岸傍村  
前路白雲外  
孤帆安可論

鄭霍二山人

翩翩繁華子  
多出金張門  
幸有先人業  
早蒙明主恩  
童年且未學  
肉食鴛華軒  
豈乏中林士  
無人薦至尊  
鄭公老泉石  
霍子安丘樊  
賣藥不二價  
著書盈萬言  
息陰無惡木  
飲水必

清源吾賤不及議斯人竟誰論

清如玉壺冰

藏冰玉壺裏冰水類方諸未共銷丹日還同  
照綺䟽抱明中不隱會淨外疑虛氣似庭霜  
積光言砌月餘曉凌飛鵲鏡宵映聚螢書若  
向夫君比清心尚不如

春日直門下省早朝

騎省直明光鷄謁建章遙聞侍中佩閣識  
令君香玉漏隨銅吏天書拜夕郎旌旗映閭  
闔歌吹滿昭陽官舍梅初紫宮門柳欲黃碩  
將遲日意同與聖恩長

襍詩

朝因折楊柳相見洛城隅楚國無如妾秦家  
自有夫對人傳玉腕映燭解羅襦人見東方  
騎皆言夫壻殊持謝金吾子煩君提玉壺

上張令公

珥筆趨丹陛垂璫上玉除步簷青瑣闥方慙  
畫輪車市閱千金字朝開五色書致君光帝

典薦士滿公車伏奏迴金駕橫經重石渠從  
茲罷角抵且復幸儲胥天統知堯後王章笑  
魯初匈奴遙俯伏漢相儼簪裾賈生非不遇  
汲黯自堪踈學易思求我言詩或起予嘗從  
大夫後何惜隸人餘

哭褚司馬

妄識皆心累浮生定死媒誰言老龍吉未免  
伯牛災故有求仙藥仍餘遁俗杯山川秋樹  
苦窓戶夜泉哀尚憶青騾去寧知白馬來漢  
臣脩史記莫蔽褚生才

過沈居士山居哭之

揚朱來此哭桑扈返於真獨自成千古依然  
舊四鄰閑簷喧鳥雀故榻滿埃塵曙月孤鶯  
轉空山五柳春野花愁對客泉水咽迎人善  
卷明時隱黔婁在日貧逝川嗟爾命丘井嘆  
吾身前後徒言隔相悲詎樂晨

哭祖六自虛

否極嘗聞秦嗟君獨不然憫凶纔稚齒羸疾



主中年餘力文章秀生知禮樂全翰留天帳  
覽詞入帝宮傳國訐終軍少人知賈誼賢公  
卿盡虛左朋識共推先不恨依窮轍終期濟  
巨川才雄望羔鴈壽促背貂蟬福善聞前錄  
殲良昧上玄何辜鍛鸞翮何事與龍泉鵬起  
長沙賦麟終曲阜篇城中君道廣海內我情  
偏乍失疑猶見沉思悟絕緣生前不忍別死  
後向誰宣為此情難盡彌令憶更纏本家清  
渭曲歸葬舊塋邊永去長安道徒開京兆阡  
旌車出郊甸鄉國隱雲天定作無期別寧同  
舊日旋候門家屬苦行路國人憐送客哀終  
進征途泥復前贈言爲挽曲奠席是離筵念  
昔同携手風期不慙捐南山俱隱逸東洛類  
神仙未省音容間那堪生死遷花時金谷飲  
月夜竹林眠滿地傳都賦傾朝看藥船群公  
咸屬目微物敢齊肩謬合同人旨而將玉樹  
連不期先掛劔長恐後施鞭爲善吾無矣知  
音于絕焉琴聲縱不沒終亦斷悲絃

王摩詰集卷第五



